

Oleh Sri Ayu  
Kartika Amri

kartika@hmetro.com.my

(21 Jun 2021) Harian Metro, p. 8

## 600 dos setiap lokasi

**Kuala Lumpur**

**W**ilayah Persekutuan Kuala Lumpur, Putrajaya dan Labuan dijangka dapat mencapai sasaran imuniti kelompok seawal Ogos ini, malah dijangkakan lebih awal berbanding negeri lain apabila Kementerian Wilayah Persekutuan (KWP) meneruskan pelaksanaan fasa kedua Program Vaksinasi Bergerak MyMedic@Wilayah.

Seramai 31,987 orang akan menerima vaksin mulai semalam hingga 23 Jun ini membabitkan golongan individu yang berisiko tinggi untuk dijangkiti Covid-19,

*Wilayah Persekutuan dijangka capai imuniti kelompok Ogos ini*

termasuk peniaga, pekerja di pasar harian serta penjaja, kawasan industri, penempatan gelandangan, Program Perumahan Rakyat Majlis Tindakan Ekonomi Negara (PPR MTEN), Perumahan Awam Dewan Bandaraya Kuala Lumpur (PA DBKL) dan kampung tradisi.

Menteri Wilayah Persekutuan Tan Sri Annuar Musa berkata, fasa kedua itu membabitkan 22 lokasi antaranya Pasar Borong Kuala Lumpur, Pasar Harian Selayang, lapan kawasan in-

dustri, tujuh PPR MTEN dan PA DBKL, pusat penempatan gelandangan di Pusat Komuniti Setiawangsa, Desa Aman, Desa Tasik, Kampung Sungai Penchala serta

Kampung Padang Balang.

Katanya, dengan kapasiti 600 dos vaksin sehari bagi setiap lokasi yang menggunakan keseluruhan 10 trak vaksin bergerak ini, ia akan dapat mencapai sasaran 80 peratus warga Kuala Lumpur di-

vaksinasi menjelang Ogos depan.

"Inisiatif ini adalah lanjutan daripada Program Rintis Vaksinasi Bergerak MyMedic@Wilayah yang bermula sejak 7 hingga 13 Jun lalu.

"Dalam tempoh itu, sebanyak 24,500 dos vaksin sudah diberikan kepada kumpulan sasar di Kuala Lumpur. Melihat kepada kejayaan ini, Badan Bertindak Imunisasi Covid-19 (CITF) memberikan kebenaran kepada KWP untuk menerus-

kan Program Vaksinasi Bergerak MyMedic@Wilayah.

"Inisiatif ini dilakukan untuk meningkatkan tahap kesiapsagaan dengan memfokuskan pemberian vaksin kepada warga Kuala Lumpur bagi mencapai imuniti kelompok dalam kadar segera," katanya dalam kenyataan media, semalam.

Menurutnya, KWP menyasarkan 33,000 suntikan vaksin dalam sehari untuk dilaksanakan di Kuala Lumpur, Putrajaya dan Labuan.

Katanya, sasaran itu mampu dicapai menerusi pertambahan Pusat Pemberian Vaksin (PPV) mega selain PPV di klinik dan hospital swasta serta vaksinasi melalui Program Vaksinasi Bergerak MyMedic@Wilayah.



ANNUAR